

SAN PABLO KARTA E'SU FXI'JNI TIMOTEO JÏI

Pablo' Timoteo's fxi'jni

¹ Adxa' Jesukristo jxkaahnisa Pablo yaaseth. Txãasa Dvus kaahnisath, txã'wẽ Kristo Jesusa's jxpa'gate', txã' ïtxi fxi'zewa'ja's ũswa'jsa' jïna pta'sxkahn.

² Adx nçxi'k na'wẽsa Timoteo idxa's fxi'jaçthu, Dvus kwe'sx Tata vxite' kwe'sxtxi jxpe'jsa Jesukristo txãawe'sx peeygãhçxa pu'çxte', idxa' ewçxáa wët fxi'zene'ga.

Jesukristo' nwe'wesa' jïna pta'sxwa'ja's thaa-menu

³ Kus ma'k yuu en ma'k yuu nawa bagaçxtewa Dvus yakh puutx we'we iisath idxa's yajkxna Dvusa's weçxá', adx ũuste kïh pkal yuhwa ji'phméé txã'sçxáanath selpi' adx yaçgawe'sx ma'wẽne'ta selpi' txã'wẽy.

⁴ Idx pxthaa ũ'nena neeyũuni's wala yaaki'th, txãasath idx yakh puutx uywaça' iiméh wala weçxawa'ja's ji'phu'nja'w sũju'.

⁵ Idxa' Dvusa's ũusuh jxukag yaaki' txã'sa' jïith, nyafxiia' iidx neepezx Loida vxite' iidx mama Eunice txãawe'sxtxi txã'wẽ yaakxwa'ja's ji'phu', nawa açxha' txã'wẽ yaakxwa'ja's idxwa ji'phne'ga sũju'th.

⁶ Txãa pa'gath idxa's yu'kxpeje' na'wẽ adx idxa's peekizeçxa Dvus yakh puutx we'wete', Dvusa' ũsku idx kïhtewa sxiigméeé fxi'zewa'ja's,

aça' txãatxi' jweeíçxáa peçxkanamée pa'pçxuna mfxi'ze.

⁷ Dxusa' kwe'sx ũukhna fxi'zewa'ja's ũsme', wejxwa ũukhmée çxhãçxha yajkxna peeygãhna peekíi ew fxi'zewa'j txã'wēsaxku ũs.

⁸ Txãa pa'ga thaamena ũukhnu kwe'sxtxi jxpe'jsa Jesukristo' nwe'wesa yuja' jina pta'sxwa'ja's, sa' Jesukristo's selpiipa'ga adx preesu ũsthu txãa pa'gawa thaamenu. Dvus yuwe ewte nvxiitwa'jsa's pta'sxpa'ga nxuswa'j en pa'thewa txã'sa' yajkxmée, Dxusa' adxa's kçxhãaçxha'jana sũhnaçxáa mes.

⁹ Dxusa' kwe'sxtxi nwe'weçxa txhitxku, txajx dxi'pte kíh pkal yuhwa ji'phmée fxi'zekahn. Nawa txajx dxi'pte kwe'sx ew yũupa'ga txã'wē txhitxme', naasáa txajx jxthãasni' txã'wēk yu' naa pa'gaçxáak kwe'sxtxi' peeygãhçxa txhitxh, txã'wē Kristo Jesus yakh utxaapa'ga. Naa kiwe meetey Dxusa' kwe'sxtxi peeygãjk.

¹⁰ Nawa txajx peeygãani' kwe'sxtxi nwe'wesa Jesukristo kíinijũk isa áate vxyaa. Txajuk Jesukristo' uuwa'ja's knayçxa ki' itxi yuuwa'ja's vxit, sa' áate kaajiyu'kh bagaçxte yuhwa pçumée itxi fxi'zewa'ja's. Txã'wē yũuni'sku Kristo yuwe ewte nvxiitwa'jsa' pta'sxi'.

¹¹ Aça' txãa Kristo yuwe's pta'sxkahnku adxa's Dxusa' nvxiht, judiu ji'jmée vxite nasatxwa kaapiya'khan.

¹² Txãa pa'gath txakwe wala thēyte fxi'ze'. Nawa thaame'çmeeth, txãa pa'gatey jiith kim txã'wē adx yakh pu'çxna ũstewa, sa' ew jiith Kristo tasxte ũswa'j en áhpkaçx txã' adx neewe'weni's kxtey yuuna nes yuuna.

¹³ Aça' idxa' adx ma'wêtká ew kaapiya'j txã'wêçxáa mfxi'ze, sa' Dxusa's ũusuh jxuka yajkxna peeygãawa'ja'swa ũuste ji'phgu Kristo Jesus yakh fxi'zepa'ga txãatxi's peçxkanamée mfxi'ze.

¹⁴ Idxna Dxus neewe'weçxa nvxiitni's wala ew mpa'yajkx peçxkanamée, aça' Dxus Espiritu kwe'sx ũuste ũssa' pu'çxhina.

¹⁵ Idxa' jiiyã'jne'ga, Asia kiwesuwe'sx jxukaysa adxa's thegmée nvxihttxi, vxite' Fxigelo Hermógenes txãawe'sxwa txuteetx.

¹⁶ Txã'wêtewa Onesífxoro yu' maz uswa adxa's kvxiisxa'kh adx preesu ũstewa thaamemée. Txãa pa'ga Kristo' Onesífxorowe'stxxi' nwe'wena.

¹⁷ Txãasaíik txã' Romate ũsçxa', adxa's uyp-kaçx pakwena pa'j.

¹⁸ Txã'wê ew yũupa'ga Kristo tasxna u'jwa'j en âhte', Dxusa' deweena. Idxa' ew jiiig txã' kwe'stxxi wala pu'çxsa' Efxesote.

2

Idxa' soldau ew nwêese'jsa na'wê myuu

¹ Adx nçxi'k na'wêsa idxa' Kristo Jesus pu'çxni's jxpa'gaçxa Dxus yakh çxhãçxha mfxi'ze.

² Nasa maazkuêesa ksxavxyte adx ma'wêne'tka pta'sx txãa pta'sxni'síiçxáa mkaapiya'j Dxus yakh ew fxi'zesatx, kxah txãawe'sxwa vxitetx txã'wêyçxáa kaapiya'jatxna.

3 Idxa' Jesukristoçxá's nwēese'jsa yā'jçxa', nxuswa'j en thēysa pa'thewa txāatxi' ũukhmée çxhāçxha myajkx.

4 Soldauwa ma'wēga vxitesu yu' nwēese'jmée soldau npiiçthē'j jxkaahniçxá's nwēese'je' txā'wēy myūu.

5 Txā'wēy knayya' pweesa'sawa ma'wē jxkaathe' kxtey nwēese'jna pa'pçxumeeçxa yu', kīh yuhwa knaymeena.

6 Mjīisawa nyafxte' mjīiwa'ja's khuē'y çxhāçxha mjīiwa'j ji'pha' uuthasx thē'the' ũ'wa'j uyya'.

7 Adx we'wenitxi's jiyuya' ũus myajkx, aç'a' Jesukristo' kaajiyu'juna jxuka.

8 Āçxha' Jesukristo' jxkaahsa Davxid ji'j uuçxawa ki' ĩtxi yuuk txā'sna myajkx. Adxa' txā'snath pta'sxi' ewte nvxiitwa'jsa' jīna.

9 Txā'wē Kristo yuwe ewsa's pta'sxpa'ga yuuçxáa preesu ũsthu yuuwesa na'wē tudni pxthaa yuuna. Nawa Dxus yuwe yu's tud-ya' ājameetxna.

10 Txā'wē Dxus yuwe's yup-ya' ājawa'jme' açiçxáath adx nxuswa'ja's ũukhmée Dxus yuwe's pta'sxi' Dxus txhitxnisa nwe'wewa'j ũstxna txāawe'stxxi peeygāhçxa, kxah Kristo Jesus yakh utxaapa'ga txāawe'sxwa ji'phutxna pçuwa'jmée weçxana ewte ũswa'ja's.

11 Na'wē yūuwa'ja's pta'sxnisa' ĩsxiinisame':

Kristo's ũuste jxpa'gaçxa uuçxa', txāa na'wēy ĩtxi fxi'ze'nja'w.

12 Makwe nxuste fxi'zewa'ja's ji'phuçxawa, cielute txāa yakh jxkaahwa'j yu'sa'

ivxiitume'nja'w.

Txã'wẽ yũumée wa'luwá'nja'w açã' txãawa
kwe'sxtxi' jxpa'gameena.

13 Meeçxa' kwe'sxa' txãa yakh kxtey
yuumeewá'nja'w, nawa txã' txajx puutx
we'weni's kxtey yuuna nes yuuna.

Txãa pa'gatey Dxusa' txajx puutx we'weni's
ĩsxiiwa'jsame'.

*Kĩhte yuhwa sxiigmée fxi'zewa'jçxá's
pa'pçxuni*

14 Yakhthẽ'jwe'sxtxi yu'kxpehni's mkaayaki'j
Dxus dxi'pte, kxah selpiwa'jmeesu we'weniçxá's
ũusçxa pasna fxi'zemeetxna. Txã'wẽsa'
selpiçme', naasáa wẽse'jsatx kaypuba'jsaçxá'.

15 Dxus dxi'pte kĩhte yuhwa sxiigmée wala
ew fxi'zewa'jçxá's mpa'pçxu, Dxus yuwe's jxpub-
amée pta'sxna, mjĩisawa ma'wẽga ew mjĩiçxa'
thaameçmée txã'wẽy myũu.

16 Selpiwa'jmeesuçxáa we'wena kaapiya'jnix
mpa'yajkx. Txã'wẽme' txã'wẽ kaapiya'jsa'
jweeĩçxáatx een isa jxpubana ewmeete wetena
u'jwe'.

17 Naapkaçxha' txãawe'sx kaapiya'jni yu'
jweeĩçxáa mteewa jxuka suwna u'jwena. Hime-
neo vxite' Fxiletowe'sxa' txã'wẽ yũusatx yu'.

18 Txãasatx isa pta'sxnijũ yu' jxpubaçxa
uusaawe'sx ĩtxi yuuwa'j ena' skhẽwyã'kh
jĩna kaypuba'jna ũsta' Dxus yakh fxi'zesatx
maaiĩtxi's.

19 Nawa maaçxah txãa jĩitewa ew jiyukahn
Dxusí na'jĩna we'weçxak nvxiht: Dxusa' jiia'

maaçxah txãa jïitewa jï'k. Sa': Jxukaysa Dxus yakh fxi'zesa' ewmeejũ jxuka txutewa'jsata' jï'k.

20 Miiyajxk: Teeçx yatte' iijxũnisa vxyuu beh vxyuu çxihme txã'wẽ ewsaçxáa ũsmeeta'. Kx-teea' açxamée selpisáa fxtũu, kiwe mitxhwa ũsta'. Nawa iijxũni ewsa' ewsaçxá's selpiwa'jsa', aça' açxamée ewsa' ewmeesuçxáa selpiwa'jsata'.

21 Txã'wẽ Dxus kusete ew selpi wẽeçxa', ewmeejũ jxuka txuteeçxa bagaçxte yuhwa pkalte wetemée Dxus yakh yuuçxáa fxi'zewa'ja'. Txã'wẽ yuuçxáa selpiiya' ya'ãjana kïhtewa ew yũuwa'ja's.

22 Idxa' piçtakxwe'sx ewmée yajkxna fxi'zenijũ txuteeçxa kïhte yuhwa jxpubamée ewçxáa mfxi'ze, Dxusçxáana yajkxna, maa yakhwa ewçxáa fxi'zena peeygãhna Dxusa's ũusuh jxuka neewe'wesawe'sx yakh utxaaçxa.

23 Yuwe kïhtewa selpiwa'jmeesatxi' nwẽese'jnu, yuwe txã'wẽsatxi' jiiyã'jg puiiwa'jçxáak kaseje'.

24 Txãa pa'gatey Dxusa's selpisá' puiisu fxi'zewa'jme', wejxwa jxukaysa yakh ewçxáa yũuna fxi'zewa'ja'. Sa' ew kaapiya'jsa yuuwa'ja', ewmée nuywe'wenitx yajkxmée.

25 Txã'wẽ ũusuh jxuka peeygãhna açasatx yu'kxpehwa'ja', Dxusa' txãawe'sx ewmée yaakxnitx yu'pthehçxa ewsa's kaajiyu'jwaça' sũhna.

26 Kxah eçxthẽ'j kusete fxi'zeni's jiyuçxa', txãajũ iyuya' ãjatxna. Txã'wẽme' eçxthẽ'ja' ma'wẽwa suwya' ũsa'.

3

Nmeh en yuuçte' na'wẽ yũusáa nasa kase-jetxna

¹ Nmeh en yuuçte', en ewmeesa ùukhũukhsa pa'jana açá' txã'wẽ yũuwa'ja's jii mfxi'ze.

² Nasa' peekx wêt fxi'zewa'jçxá's pa'pçxuçxa', vxite yuutxi' açesa, vxyuuçxá's wejx yaakxsa, iivejçx we'wena fxi'zesa, Dxusa's açewe'wesa, neywe'stxi nwẽese'jmée, ew yũutewa ka'tu yu' weçxasamée, Dxusa's yuhwa nwẽese'jya' yaakxsamée,

³ vxitetx peeygãawa'j yu'sa' ji'phmeesa, ewmée nuywe'wesa, peekx kakweju ewmée yũu wẽeniçxá's thaakwe yaakxsa, kĩhwa ewsa yu'sa' jxuka ahçeçxa seena' pkxuusáa,

⁴ ãate yu' ew we'weçxawa e'sga yu' kiikhe'jna fxi'zesa, yuwe ewmée kasehwa'jsuçxáa we'wena fxi'zesa, ew ùus yajkxmey kĩhwa yũusáa, iivejçx yaakxwa'jçxá's ji'phsa, Dxusna pakwepkaçxte naa kiwete wêt fxi'zeniçxá's pakwesáa,

⁵ Dxusa's yaakxsa na'wẽ yuh yuuna fxi'zetxna, nawa isa ùuste yu' Dxusa's ji'phmée yuutxna. Nasa txã'wẽsatx mpa'yajkx.

⁶ Txã'wẽme' txãawe'sxa' maaíi yu' yat-su pa'jçxa ìsxiijatxna u'y ew fxi'zewa'j yu'sa' ji'phmeesa pkalteçxáa fxi'zesatx. Txãa u'ya' kĩh yũu wẽeni'swa jxuka jiyu wẽenite

⁷ kaapiya'jni's jxpa'gaçxawa, isa ewsa yu'sa' jiyuya' aja'çmeeta', pkalteçxáa fxi'zepa'ga.

⁸ Ma'wẽta dxijxuusáa e'zsa Janes Jabres txãawe'sxwa Moisesa's ahçe, txã'wẽy txãa piçthẽ'jwe'sxa' isasa yu'sa' açetxna. Txãa

pa'gatey txãawe'sx ũus yaakxni' jxuka suwenia', Dxus yakh fxi'zewa'j yu'sa' ji'phmeeta' naa pa'ga.

⁹ Nawa txãa piçthē'jwe'sxa' jwee yu' kīhwa yūuya' ājameetxna, txãawe'sxa' kīhwa ji-imeesate jiyuyā'jçxa', nasa' jxukaysa jwee yu' nwēese'jmeetxna naa pa'ga, ma'wēta e'zsa Moisesa's açesawa kīhwa yūuya' ājamée txã'wēy.

Pablo' Timoteo's nmeh neewe'weçxa nvxiitni

¹⁰ Nawa idx yu' adx kaapiya'jnitx jxpubamée ũsgu. Idxa' jiig adx ew fxi'zeni, Dxusçxá's selpi-iyá' yaakxni, Dxusa's peçxkanamée yaakxni, makwe thēysa vxyaatewa txãatxi' yajkxmée fxi'zeni, peeygāhnaçxáa fxi'zeni, ma'wētká maa sūhmée wantāyi' txakwe ahçeçxa pkuuuni yuuçxawa.

¹¹ Idxa' peekx jiig Antiokía, Ikonio, Listra çxhabsu adxna pkuuuna açenitxi'. Nawa Dxusa' txãasu jxuka nwe'wek.

¹² Aça' maawa Kristo Jesusa's selpiiya' utxasa' pkuuuni yuutxna.

¹³ Naapkaçxha' ewmeesa ĩsxiisa' jweeíçxáa ewmée yūuna u'jwetxna, aça' ya'ĩsxiisa' jweeju vxitetxwa ĩsxiina u'jwetxna.

¹⁴ Nawa idx yu' iidx piyanijū weh yuhwa txutemée mfxi'ze, txãa pa'gatey wala ew jiig idxa's kim kaapiya'thewa.

¹⁵ Le'çxkuējūjx Dxus yuwe's jiyug txã' Kristo Jesus yakh fxi'zeçxa ewte pa'jwa'ja's kaajiyu'juna.

¹⁶ Txãa pa'gatey Dxus libru' jxuka Dxus kaaūusuthe'jnisaçxaçxáata', txãasa seelpisata' ewmée yūukahmén yu'kxpejxa', jxpubamée ewçxáa kaafxí'ze'jya'.

17 Kxah Dxus yakh fxi'zesa' kīhtewa sxiigmée piyaçxa ewçxáa yūuna fxi'zetzna.

4

1 Kwe'sxtxi jxpe'jsa Jesukristo jxkaahsa yuuçxa yuhna ïtxisatx vxite' uusaatx pkhakhçxa kīh yūusatewa we'weya' txajx dxi'pte vxite' Dxus dxi'pte wala ew neewe'weçthu

2 Dxus yuwe's pta'sxwa'ja's. Bagaçxtewa pta'sxna nes myuu. Pta'sxwa'j en yu'sa' ivxi-itunu, kaajiyu'jna, ewmée yūukahmén we'wena, yu'kxpehna. Bagaçxtewa wa'lmée mkaapiya'j.

3 Txã'wēme', en ājana, aça' txājūyã'ja' nasa' jxpa'gaya' wa'lutxna Dxus yuwe ewsa's makwe pta'sxtewa. Naasáa txãawe'sx ūus pēyni's kaapiya'jwa'jsaçxáa maazkuēewa pakweetxna.

4 Isa kaapiya'jni yu'sa' e'skhē nvxihtçxa, kīhwa naa kiwete kwentu'jniçxá's nwēese'jetxna.

5 Nawa idxa' jxpubamée fxi'zewa'ja's mpa'yajkx, nxussa pa'thewa çxhãçxha mfxi'ze. Sa' Dxus yuwe's pta'sxwa'the yuuçxáa mfxi'ze, iidx mjīia's weh yuhwa nvxiitnu.

6 Txã'wēme', adxa' āçxha' ikhwa'jçxáa yã'j ūsthu, adx uu ena' utxa ūsa'.

7 Nawa adxa' ewmeesa yakh puiiwa'ja's adx yuh knaythu, Dxus neewe'weni adx pta'sxwa'ja's jxuka kxtey yuuth, sa' Dxusa's yaakxwa'ja's le'çxkwe yuhwa ivxiitumeeth.

8 Txã'wē Dxus dxi'pte ew selpiina fxi'zepa'ga peeswa'j cielute jxaawni ūsa' txã' adxa's ūythasna ūsa'. Txã'sa' kwe'sxtxi jxpe'jsa khuēs ewsa txajx kīiwa'j en āhte, adxa's ūsuna. Sa' adxçxáana ūsmeena; txajx kīiwa'j ena's

weçxana ùythasna ùssa yuutxi' jxukaysatx ùsuna.

Timoteo's Pablo yuu kaahni

⁹ Ma'wētewa en kutxi'jçxa dud myuh adxa's thegya'.

¹⁰ Txã'wēme', Demasa' adxa's thegmée u'kh Tesalónikan, txã' naa kiwetewe'sxçxá'sku wejx wedxi' txãasak txã'wē yūu. Krescente' Galacia kiwenku u'j, naapkaçxha' Tito' Dalmacia kiwenku u'j.

¹¹ Aça' Lukas yuuçxáa adx yakh ūsa'. Markosa's pakweçxa pe'jçxa myuh, ayte adxa's mjii pu'çxkahn.

¹² Tíkiko's Efxeso çxhabnath kaah.

¹³ Idxa' yuhçxa', adx atxh Troas çxhabte Karpo yatte nvxihtthu txã'sa' jxūçxa yuweene'ga. Sa' librutx vxite' fxi'jni eçtxi wejx peçxkanamée jxūne'ga.

¹⁴ Çam tuça Alejandro' adxa's wala ewmée yūuk. Nawa txã'wē yūupa'ga txã'sa' Dxus jiina.

¹⁵ Idxa' mpa'yajkx txãa piçthē'ja's. Txã'wēme', txã' wala açesa yuuk kwe'sx pta'sxni's.

¹⁶ Adxa' nyafxçxah adx ma'wēsaçxawa khuēswe'sx tasxna pasya' u'the', kim yuhwa adx ju'gu yuumeeta', adxçxáanatx nvxiht. Txã'wē yūutewa, txãawe'sxtxi' Dxusa' peltunâywaça' sūju'th.

¹⁷ Makwe txã'wē yūutewa, Dxusa' adxa's pu'çxku nxuskahmén, kxahth Kristo yuwe ewte nvxiit-sa's pta'sxya' ājaçxa judiu ji'jmée vxite nasa maazkuēesatxwa kwēese'jya' āja. Dxusa' txã'wēk adxa's nwe'we león yuweju.

18 Sa' txã'wẽçxaçxáa ewmееjũ jxuka nwe'weçxa jxaawuuna cielute txajx jxkaahna ũsnitewe'sx. Wala yuh weçxa yuja' txã'wẽ ew yũupa'ga.

Pablo yuwe weçxaa kaahni

19 Ñçxha' yuwe meen weçxa Priska vxite' Akila vxite' Onesífxorowe'stxxi.

20 Erasto' Korintote neeyũuk, açá' Trofximo's Miletoteth nvxiht ãça'k txãa pa'ga.

21 Nus pa'jwa'j en ãhmeyna yujxa' mpa'pçxu. Idxa's yuwe weçxaa kaja'tx Eubulo vxite' Pudente vxite' Lino vxite' Klaudia vxite' yakhthẽ'jwe'sx jxukaysa.

22 Kwe'stxxi jxpe'jsa Jesukristo' idx yakh nes yuuna, açá' Dxusa' i'kwe'sx jxukaysatx pu'çxhina.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd